

福建叢書

第一輯

福建省文史研究館編

明·福清
葉向高撰

蒼霞草全集

(七)

福建叢書 第一輯之二

福建省文史研究館編

明·福清
葉向高撰

蒼霞草全集

(七)

江蘇廣陵古籍刻印社

蒼霞續草卷之十五目錄

徵仕郎四川眉州判官張公偕配贈恭人韓氏孺人熊氏李氏墓表

贈通議大夫都察院左副都御史詹公偕配贈淑人孫氏墓表

尚寶司丞振鵬寧公墓表

河南按察司副使午河許公偕配劉安人墓表

禮科都給事中惺宇張公墓表

何節婦碑

朱元甫傳

宋村居士傳

大廷尉華陽宋先生傳

尚書澹泉裴公傳

秦將軍傳

茂才成吾俞公傳

怡堂黃公傳

俞烈女傳

汪烈婦傳

蒼霞續草卷之十五

福清葉向高進卿甫著

徵仕郎四川眉州判官張公偕配贈恭人韓氏孺人熊氏李氏墓表

蓋中丞公之塋其父眉州公與韓熊兩母乃其官諫垣時也眉州公嘗判眉以被枉奪官比中丞貴詔復故秩而韓母之得稱恭人以覃恩贈也中丞既塋父十餘年出撫楚乃手爲狀乞銘于郭宗伯而謂余曰子其爲我表墓道之石余唯唯公諱汝駉字子修別號鶴川其先自洪洞徙涇陽凡九

世矣鶴川公生而穎異就里塾學以貧弗竟會藩
司有功曹之選試爲掾因取律令諸書讀之曉暢
大義乃嘆曰夫刑者例也成也一成而不可變奈
何舞文吏上下其手乎卽不畏人非寧逃鬼責如
後嗣何繇是廩廩奉三尺惟謹以亾害稱藩伯王
公日屬之夫夫也好修砥節又美而慙他日非但
能業官且昌後嘉靖庚戌虜闌入傳都城徵調雲
集執政司農相與憂是十數萬衆安所得食公時
掾計曹從旁爲籌纚纚可聽司農奇之滿考授彰
德衛經歷勾稽振刷衛政一清諸弊皆自洗濯稀

桂文罔郡太守以爲賢事多倚辦兩臺交章尉薦之以九載考得。 貶封遷判眉州往州佐每頤指于長吏不敢出片語爾公獨以才品受知郡守相與甚歡日講興除之事不三月州政一新矣守去公遂署其篆又歷署嘉定大邑篆所至有聲盜劫州庫公適自大邑歸部吏士格鬪盜遂巡去又采入其巢禽渠魁搜獲藏金千餘當道甚喜錄其功又委署雅州雅與邛鄰壤邛守嫉公能而公又急繩茶商之爲奸者商以賄祈峻拒之遂訴公于直指事下邛守公竟爲所螫挂冠歸歸時兩尊人俱

無恙朝夕侍養意甚得也而又出貲分予其弟姪
旁及姻戚閭里人咸稱公爲長者又嚴于課子每
以自讀書未了爲念中丞登鄉書矣三上春官不
第公患曰兒學不力耶何屢躋也中丞第則又曰
吾非望兒青紫也貴成吾志耳中丞筮仕爲茲令
公詔以百里之內命懸于宰非廉非慈曷稱父母
其再令漣也迎公官舍公入境問俗田夫野老咸
能稱令治狀公爲之開顏逮入爲給事中公諄諄
舉諫法爲訓而要歸于勿欺而犯之一語中丞服
膺不敢失故其在諫垣不激不隨甚得言官之體

邇來議論騰囂上下疑阻人益思中丞本之則公
教也公素性恬淡冲和不喜聲勢就濰養甫一月
輒歸涇濱聚里族鬪鷄蹋鞠爲樂卽中丞官日顯
庸公深自挹損與鄉人齒無貴倨態蓋至以耄年
終而人猶惋惜曰胡不百歲也其厚德人人見于
思慕者如此元配韓恭人事姑章孝與妯娌和攻
苦食淡至屢脫簪珥不惜繼熊孺人亦善持家澣
濯縫紉皆躬親公遭讒去眉不能無芥蒂孺人時
相寬譬中丞喪偶有遺息孺人辛勤撫育人以此
賢之其後沒乃復繼李孺人蓋公三娶矣公起家

掾史官至州倅亦爲不薄才而見媚用而未究此
所以有中丞也余聞中丞在楚屬大浸稽天人將
魚鼈又採木役興中產之家皆岌岌不自保賴中
丞百方經畫楚之人始有寧宇世方望中丞人佐
嚴廊典衡軸之任乃 天子若重去中丞于楚者
其猶有湯沐之念也余與中丞同成進士同出吳
航陳先生門習聞公事故因中丞請而次公之行
誼以揭于其阡使過者讀焉知中丞之所樹立蓋
有由來而好修者亦可以觀于天人之際矣

贈通議大夫都察院左副都御史詹公偕配贈

淑人孫氏墓表

三代之世以三德六行論士于鄉故修之家者可
以顯于世然而巢許務光卬屠狄庚桑河上公漢
陰丈人之流非有立言君子爲之紀述則其名姓
亦終湮沒不章而後世之作史者乃始創爲隱逸
獨行諸傳以稍收其殊異者以示勸然其伏于巖
巖厄于蓬華而不爲世所知載筆家所不及錄者
又何限也惟其有子孫之賢賢而又顯者爲能暴
揚其祖父之行以告于人而又不能遽登于金匱

石室之藏不得已而復托之于文人學士之筆與口庶幾爲不朽此近世表志碑傳之文所以多也而又有去之稍久不能盡舉其行誼以備論述徒存一二梗概云耳則雖文人學士亦無以藉手愈足惜已吾嘗從今御史中丞詹公遊而知其祖贈通議公之賢蓋亦庶幾前世逸民之流可以不朽者然吾問通議公之生平則中丞亦不能對惟云其長厚孝友嚴事三兄友愛諸弟居恒足不踰閭所居去縣治不一里終其身未嘗一至而已其他隱德卒無知之者乃中丞則又能言其祖母孫淑

人之賢與通議公埒蓋嘗脫簪珥聘沈氏以助選而無難色沈氏者實舉封給諫公以有中丞者也給諫僅七齡而沈氏沒孫實撫之又買李氏以繼沈復舉少子賢故孫雖無出于詹而詹氏之爲通議公子若孫者其念孫甚于其所出也嗟夫孫氏若此通議公閨門之化何如哉通議公旣沒若干年而始以中丞貴贈通議大夫左副都御史孫沈皆淑人中丞乞余文以表其墓余惟以通議公之賢益之以伉儷文有賢而顯如中丞者爲之孫欲闡揚其祖德而其所可述者僅僅如此益足以見

夫草野之士有聞于世者之難然通議公所爲行
不在其身而在于再傳其所爲顯融章灼托以不
朽者亦不盡在文人學士之筆與口而在于人
主之綸褒則較之前史所載其所得固已贏矣此
余之藉手以復中丞者也中丞之先出自詹尹至
宋熙寧間有元臣者生二子長友文舉政和進士
次友端舉建炎解首友端嘗監池州酒稅死劇賊
戚方之難賜諡節愍官其子理爲文學今詹氏之
居宛向者以文學爲始祖自文學至通議公蓋十
六世爲宛右族余故並著以俟過公之墓者考焉

尚寶司丞振鵬甯公墓表

甯公與余同成癸未進士同讀中秘書時同事者
率汗漫嬉遊三五聚譚窮極宇宙間怪誕幽渺之
說盼盼然望日昃出署以此爲常而公獨下帷力
學書聲琅琅徹于署中人則獨先出則獨後雨雪
寒暑不請休沐蓋三年如一日也爲文亦博綜宏
富幅尺甚寬而微乏裁製竟出爲禮部精繕主事
公雖自中秘出然學問行誼已籍甚士大夫間在
禮部亦勤于其職不少厭薄未幾晉其司郎中會
母姚淑人春秋高欲陳情歸養大宗伯重其人爲

請予假公曰母老矣卽予假亦終不可出何如歸
養之爲安也大宗伯不能強竟如其意去居膝下
若干年備極孝養淑人沒擗踊幾絕終喪起守舊
官擢尚寶司丞久之始推大理寺丞人以爲淹乃
寺丞 命尚未下而公沒矣公家世將種自其始
祖寬以下世爲潁州衛指揮同知父希武好讀書
能通易書春秋左傳蚤謝行間老猶吟咏自娛嘗
榜其舟曰慷慨辭三品逍遙任五湖以公滿考贈
定遠將軍公之嗜學起家本之自定遠公教也當
公舞象時卽以穎異著聲旣爲諸生乃復淹困歲

丙子始舉于鄉三上春官始第其終養歸杜門歸
執自疏水承歡外一切不聞兀坐終日默無一言
兒女輩從容請事亦不答唯唯而已人莫能窺其
際家雖貧而好施每值歲祲輒捐其田之人以給
餓者宗族姻黨有求未嘗不應至于自奉蕭然寒
士耳嘗欲構一亭于田間爲遊息地費僅三十緡
卒不能辦丞尚寶日曾攜家自隨以薪粲不給隨
遣去僦居蕭寺中蔬羹觸飯二三奴子寂莫不堪
而公意甚適也長安縉紳徵逐宴會歌樓酒肆常
無虛日公未嘗錯趾之日囊中僅有錢數百文